

Na osnovu člana 23. stav 1. Zakona o prostornom planiranju i korištenju zemljišta na nivou Federacije Bosne i Hercegovine ("Službene novine Federacije BiH", broj 2/06 i 72/07), na prijedlog Vlade Federacije Bosne i Hercegovine, Parlament Federacije Bosne i Hercegovine, na sjednici Predstavničkog doma, održanoj 25. septembra 2007. godine i na sjednici Doma naroda, održanoj 18. oktobra 2007. godine, donio je

ODLUKU

O PRISTUPANJU IZRADI PROSTORNOG PLANA PODRUČJA POSEBNIH OBILJEŽJA OD ZNAČAJA ZA FEDERACIJU BOSNE I HERCEGOVINE - SLIV RIJEKE UNE ZA PERIOD OD 2007. DO 2027. GODINE

I.

Pristupa se izradi Prostornog plana područja posebnih obilježja od značaja za Federaciju Bosne i Hercegovine - sliv rijeke Une (u daljnjem tekstu: PP područja posebnih obilježja - sliv rijeke Une).

PP područja posebnih obilježja - sliv rijeke Une izrađuje se za period od 2007. do 2027. godine.

II.

PP područja posebnih obilježja - sliv rijeke Une radi se za područje definirano Odlukom o utvrđivanju područja sliva rijeke Une područjem posebnih obilježja od značaja za Federaciju Bosne i Hercegovine ("Službene novine Federacije BiH", broj 32/04) i Studijom izvodljivosti za nacionalni park Una.

III.

Priprema, izrada i sadržaj PP područja posebnih obilježja - sliv rijeke Une radit će se u skladu sa odredbama Zakona o prostornom planiranju i korištenju zemljišta na nivou Federacije Bosne i Hercegovine, koje se odnose na izradu planova prostornog uređenja i Uredbe o jedinstvenoj metodologiji za izradu dokumenata prostornog uređenja ("Službene novine Federacije BiH", broj 63/04).

IV.

Rok za izradu PP područja posebnih obilježja - sliv rijeke Une je 12 mjeseci od dana stupanja na snagu ove Odluke.

V.

Nosilac pripreme za izradu PP područja posebnih obilježja - sliv rijeke Une je Federalno ministarstvo prostornog uređenja (u daljnjem tekstu: Ministarstvo).

Nosilac pripreme za izradu PP područja posebnih obilježja - sliv rijeke Une dužan je osigurati saradnju i usaglašavanje stavova sa svim subjektima planiranja i drugim zainteresiranim osobama na odnosnom području, a posebno sa vlasnicima nekretnina, nosiocima prava raspolaganja i korištenja dijelova područja i objekata na tom području ili u njegovoj neposrednoj okolini.

Posebnu saradnju i usaglašavanje stavova u pogledu planskog uređenja područja sliva rijeke Une nosilac pripreme osigurat će sa odgovarajućim organima i organizacijama kantona i općina na čijoj se teritoriji područje nalazi.

Nosilac pripreme će za potrebe uključivanja javnosti u proces pripreme i izrade PP područja posebnih obilježja - sliv rijeke Une izraditi Program kojim će se definirati organiziranje tribina, okruglih stolova, javnih uvida i rasprava i drugih oblika uključivanja javnosti u svim fazama pripreme i izrade PP područja posebnih obilježja - sliv rijeke Une.

VI.

Za potrebe stručnog praćenja, usmjeravanja i utvrđivanja koncepta PP područja posebnih obilježja - sliv rijeke Une nosilac pripreme formirat će Savjet plana (u daljnjem tekstu: Savjet).

Savjet će biti sastavljan od predstavnika: Ministarstva, Federalnog ministarstva okoliša i turizma, Federalnog ministarstva poljoprivrede, vodoprivrede i šumarstva, Federalnog ministarstva kulture i sporta, Federalnog ministarstva obrazovanja i nauke, Federalnog ministarstva prometa i komunikacija i Federalnog ministarstva razvoja, poduzetništva i obrta, kao i predstavnika stručnih, naučnih i drugih institucija, te predstavnika kantona i općina i kantonalnih zavoda.

U toku procesa pripreme i izrade PP područja posebnih obilježja - sliv rijeke Une Savjet pomaže nosiocu pripreme plana u usaglašavanju sektorskih politika, izboru stručnjaka i stručnih institucija za studije, elaborate i dr., daje mišljenje o primjedbama i sugestijama prikupljenim u toku javne rasprave i učestvuje u ostalim aktivnostima definiranim ovom Odlukom sve do usvajanja PP područja posebnih obilježja - sliv rijeke Une.

VII.

Nosioca izrade PP područja posebnih obilježja - sliv rijeke Une izabrat će nosilac pripreme u skladu sa Zakonom o javnim nabavkama Bosne i Hercegovine ("Službeni glasnik BiH", br. 49/04, 19/05, 52/05, 8/06 i 70/06).

Nosilac izrade može biti samo pravno lice registrirano za izradu dokumenata prostornog uređenja.

Nosilac izrade može ugovorom angažirati stručnjake iz pojedinih oblasti potrebne za izradu Plana.

Nosilac izrade dužan je izraditi prednacrt, nacrt i prijedlog Plana u skladu sa Zakonom o prostornom planiranju i korištenju zemljišta na nivou Federacije Bosne i Hercegovine, Uredbom o jedinstvenoj metodologiji za izradu dokumenata prostornog uređenja i drugim propisima donesenim na osnovu zakona i ovom Odlukom.

VIII.

Federalni organi i organizacije nadležni za oblasti od značaja za uređenje i korištenje prostora a posebno nadležni za: okoliš, turizam, poljoprivredu, šumarstvo, vodoprivredu, rudarstvo, energetiku, industriju, promet, komunikacije, nauku, obrazovanje, kulturu, sport, zdravstvo, zaštitu kulturnog, historijskog i prirodnog naslijeđa, kao i organizacije koje raspolažu sa statističkim podacima koji se prikupljaju na nivou Federacije Bosne i Hercegovine, dužni su nosiocu pripreme za izradu PP područja posebnih obilježja - sliv rijeke Une staviti na raspolaganje sve informacije, planove, programe i druge podatke o prostoru sa kojima raspolažu.

Podatke i druge informacije, mišljenja i saglasnosti nosiocu pripreme osigurat će i privredne komore, društva i druga pravna lica nadležna za komunalne djelatnosti, predstavnici vjerskih zajednica, te drugi nadležni organi i organizacije koje zakon na to obavezuje.

Zakonodavna tijela kantona dostavit će nosiocu pripreme sve relevantne podatke i planove prostornog uređenja i razvoja kao i planove razvoja pojedinih oblasti za taj kanton.

Izuzev naknade troškova umnožavanja materijala pravo na naknadu za davanje potrebnih informacija i dokumenata nemaju korisnici sredstava iz budžeta.

IX.

Postupak pripreme i izrade PP područja posebnih obilježja - sliv rijeke Une obuhvatit će dvije faze:

- I. **FAZA - PRIPREMA I IZRADA PROSTORNE OSNOVE S OPĆIM I POSEBNIM CILJEVIMA PROSTORNOG UREĐENJA**
- II. **FAZA - IZRADA PREDNACRTA, NACRTA I PRIJEDLOGA PROSTORNOG PLANA PODRUČJA POSEBNIH OBILJEŽJA**

X.

Prostorna osnova područja posebnih obilježja - sliv rijeke Une radi se u skladu sa odredbama Uredbe o jedinstvenoj metodologiji za izradu dokumenata prostornog uređenja, s tim da se obrađuju sadržaji koji stvarno postoje na ovom području kao i elementi koji ga čine posebnim.

Izradi PP područja posebnih obilježja - sliv rijeke Une prethodi izrada Studije izvodljivosti i sastavni je dio Prostorne osnove.

Prostornu osnovu područja posebnih obilježja - sliv rijeke Une donosi Parlament Federacije Bosne i Hercegovine na prijedlog Vlade Federacije Bosne i Hercegovine.

XI.

Sastavni dio PP područja posebnih obilježja - sliv rijeke Une je Odluka o provođenju, koja obuhvata Program mjera prostornog uređenja i aktivnosti za provođenje Plana, kao i detaljna uputstva kojima se osigurava usklađivanje prostorno - planske dokumentacije.

XII.

Po isteku četiri godine od donošenja PP područja posebnih obilježja - sliv rijeke Une radi se Izvještaj o stanju u prostoru (u daljnjem tekstu: Izvještaj).

Izvještaj će sadržavati analizu provođenja PP područja posebnih obilježja - sliv rijeke Une, ocjenu provedbenih mjera i njihove djelotvornosti za svrsishodno upravljanje prostorom, za zaštitu prirodnih, kulturnih i drugih vrijednosti ovog prostora, te druge elemente od značaja za prostorno uređenje.

Program mjera sadrži ocjenu potrebe izrade novih, odnosno izmjenu i dopunu postojećeg dokumenta prostornog uređenja, potrebu pribavljanja podataka i stručnih podloga za njegovu izradu, te druge mjere od značaja za izradu i donošenje tog dokumenta.

Programom mjera može se utvrditi potreba posebnih mjera zaštite područja od značaja za Federaciju Bosne i Hercegovine, izvori finansiranja, kao i rok provedbe.

XIII.

Dinamika pripreme i izrade PP područja posebnih obilježja - sliv rijeke Une po fazama iz tačke IX. ove Odluke definirani su Programom i planom aktivnosti za izradu PP područja posebnih obilježja - sliv rijeke Une, koji je sastavni dio ove Odluke.

XIV.

Sredstva za izradu PP plana područja posebnih obilježja - sliv rijeke Une, osiguravat će se u Budžetu Federacije Bosne i Hercegovine.

XV.

Do usvajanja i donošenja PP područja posebnih obilježja - sliv rijeke Une ne mogu se donositi prostorno planski dokumenti užeg područja, niti detaljni planovi prostornog uređenja.

U periodu pripreme i izrade PP područja posebnih obilježja - sliv rijeke Une, odnosno do donošenja Plana, zabranjuje se gradnja na području utvrđenom Odlukom o utvrđivanju područja sliva rijeke Une područjem posebnih obilježja od značaja za Federaciju Bosne i Hercegovine.

Izuzetno od stava 2. ove tačke, dozvoljena je gradnja u skladu sa prostorno-planskim dokumentima donesenim prije stupanja na snagu ove Odluke i Odluke o utvrđivanju sliva rijeke Une područjem posebnih obilježja od značaja za Federaciju Bosne i Hercegovine.

Na području obuhvaćenom granicama iz Odluke o utvrđivanju područja sliva rijeke Une područjem posebnih obilježja od značaja za Federaciju Bosne i Hercegovine svi projekti i aktivnosti koji se namjeravaju realizirati u prostoru moraju proći procjenu uticaja na okoliš, uključujući i izgradnju individualnih stambenih objekata.

XVI.

Ova Odluka stupa na snagu narednog dana od dana objavljivanja u "Službenim novinama Federacije BiH".

PF broj 01,02-02-541/07
18. oktobra 2007. godine
Sarajevo

Predsjedavajući
Doma naroda
Parlamenta Federacije BiH
Stjepan Krešić, s. r.

Predsjedavajući
Predstavničkog doma
Parlamenta Federacije BiH
Safet Softić, s. r.

PROGRAM I PLAN

AKTIVNOSTI ZA IZRADU PROSTORNOG PLANA PODRUČJA POSEBNIH OBILJEŽJA SLIVA RIJEKE UNE

Prostorni plan područja posebnih obilježja sliva rijeke Une, radit će se u dvije faze:

1. I FAZA - PRIPREMA IZRADE PLANA

- a) Donošenje ODLUKE O PRISTUPANJU IZRADI PROSTORNOG PLANA PODRUČJA POSEBNIH OBILJEŽJA SLIVA RIJEKE UNE
Rok:.....2007. godine
- b) Izrada PROSTORNE OSNOVE PODRUČJA POSEBNIH OBILJEŽJA SLIVA RIJEKE UNE u skladu sa tačkom X. ove Odluke. Za izradu Prostorne osnove područja posebnih obilježja sliva rijeke Une koristit će se svi raspoloživi podaci, do sada urađene studije, elaborati i sl. (izrada u toku)
Rok:.....2007. godine
- c) Javni uvid u Prostornu osnovu i Studiju izvodljivosti uključivanjem javnosti kroz organizirane oblike javne rasprave i usaglašavanje sa subjektima planiranja
Rok:.....2007. godine
- d) Donošenje Prostorne osnove (uključujući Studiju izvodljivosti) od strane Parlamenta Federacije Bosne i Hercegovine, na prijedlog Vlade Federacije Bosne i Hercegovine
Rok:.....2007/2008.godine

2. II FAZA - IZRADA PLANA

- a) Izrada Prednacrtu Prostornog plana područja posebnih obilježja sliva rijeke Une
Rok:.....2008. godine
- b) Utvrđivanje Nacrta Prostornog plana područja posebnih obilježja sliva rijeke Une i otvaranje javnog uvida i rasprave
Rok:.....2008. godine
- c) Javni uvid i rasprava o Nacrtu Prostornog plana područja posebnih obilježja
Rok:.....2008. godine
- d) Sumiranje i obrada rezultata javne rasprave
Rok:.....2008. godine
- e) Izrada Prijedloga Prostornog plana područja posebnih obilježja sliva rijeke Une i podnošenje istog Parlamentu Federacije Bosne i Hercegovine na usvajanje
Rok:.....2008. godine